





Pan Pierre Pethou]














# Les Libertez de 194 l'Eglise Gallicane.



A LYON,

PAR GVICHARD IVLLIERON, ET THIBAVD ANCELIN, Imprimeurs du Roy.

M. D. XCIIII.

Auec permission.

tan 1911.

Cace 5 39

1594

THE NEVBERRY LIBRARY



# LIBERTEZ DE L'EGLI-SE GALLICANE.

Libertez de l'Eglise Gallicane, & dont ils ont esté si fort ialoux, ne sont point passedroits, ou privileges exorbitans, mais plustost franchises naturelles, & ingenvitez ou droits communs, quibus (comme parsét les Prelats du grand concile d'Afrique, escrivans sur pareil sujet au Pape Celestin) nulla patrum definitione derogatum est Ecclesia Gallicana: esquels nos ancestres se sont tres constamment maintenus, & desquels partant n'est besoin monstrer autre tiltre, que la retenue & naturelle iouïssance d'iceux.

Les particularitez de ces Libertez pourront sembler infinies, & neantmoins estans bié cossiderees, se trouuerot dependre de deux maximes fort conexes, que la France a tousiours tenues pour certaines.

## LIBERTEZ DE

La premiere est, Que les Papes ne peuuent rien commander ny ordoner, soit en general ou en particulier, de ce qui concerne les choses téporelles és pays & terres de l'obeissance & souveraineté du Roy tres-Chrestien: & s'ils y commandent ou statuent quelque chose, les sujets du Roy, encore qu'ils fussent clers, ne sont te-

nus leur obeir pour ce regard.

La seconde, Qu'encores que le Pape soit recogneu pour suzerain és choses spirituelles:toutesfois en France la puissance absolue & infinie n'a point de lieu, mais est retenue & bornee par les canons & regles des anciens cociles de l'Eglise receus en ce royaume. Et in hoc maxime consistit libertas Ecclesia Gallicana: comme en propres termes l'Vniuersité de Paris (qui garde, come dit l'ancien Roman François, la clef de nostre Chrestienté, & qui a esté insques à cy tressoigneuse promotrice, & conseruatrice de ces droits) seit dire & proposer en pleine Cour de Parlement, lors qu'elle s'opposaàla verification des bulles de la legation du Cardinal d'Amboise.

De ces deux maximes dependent ou coniointement ou separément, plusieurs L'EGLISE GALLICANE. 3 autres particulieres, qui ont esté plustost prattiquees & executees qu'escrites par nos ancestres, selon les occurrences & sujets qui se sont presentez.

De la premiere semble principalement

dependre ce qui s'ensuit.

Le Roy Tres-Chrestien oinet, premier fils & protecteur de l'Eglise Catholique, enuoyat ses Ambassadeurs au Pape esleu, pour le congratuler de sa promotion, & le recognoistre comme pere spirituel & premier de l'Eglise militante, n'a accoustumé d'vser de termes de si precise obeissance, que plusieurs autres princes qui d'ailleurs ont quelque special deuoir ou obligation particuliere enuers le sainct siege de Rome, comme vassaux, tributaires ou autrement: mais seulement se recommande, & le royaume que Dieu luy a comis en souueraineté, ensemble l'Eglise Gallicane aux faueurs de sa saincteté. Et telle est la forme contenue és plus anciennes instructions de telles charges, & ambassades, notammentés lettres du Roy Philippes le Bel, au Pape Benedict x1. iadis enuoyees par le fieur de Mercueil, messire Guillaume du Plessis cheualier, & maistre Pierre de Bel-

# LIBERTEZ DE

le-perche Chanoine en l'Eglise de Chartres ses conseillers & ambassadeurs à ceste fin: ausquels toutesfois il done encor pouuoir de rendre à sa beatitude, plus ample telinoignage de toute reuerence & deuotion. Et plus grade submission que le Roy Loys onzieme à son aduenement à la couronne voulur faire par le Cardinal d'Alby au Pape Pie second pour aucunes particulieres occasions, dont se trouvent encor quelques remarques, ne fut trouuee bonne par ses sujets, notamment par sa Cour de Parlement, qui luy en feit de fort grandes remonstrances & de bouche & par escrit dés lors publié: Et depuis encor, tous les trois Estats du Royaume assemblez à Tours en firent vnanimement plaintes, dont se peuvent voir les restes és cayers lors presentez par maistre Iean de Rely, Docteur en la faculté de Theologie, & chanoine de l'Eglise de Paris, deputé desdicts Estats.

En somme, les Rois Tres-Chrestiens ayans exposé non seulemet leurs moyens, mais aussi leurs propres personnes pour mettre, restablir, & maintenir les Papes en leur siege, accroistre leur patrimoine de L'EGLISE GALLICANE.

tresgrans biens temporels, & conseruer leurs droits & authoritez par tout, les ont tousiours recogneus pour peres spirituels, leur rendans de franche voloté vne obeifsance non seruile, mais vrayement filiale, & (comme disoient les anciens Romains en chose non du tout dissemblable) sanctitatem Apostolica sedis sic comiter conservantes, quemadmodu principes liberos decet, si non aquo iure (comme il faut confesser qu'és choses spirituelles il y a preeminence & superio-

rité de la part du sainct siege Apostolique) certe non vt dedititios, aut fundos.

Aucuns de nos Docteurs François ont aussi dict & laissé par escrit, que les Papes à leur aduenemet estoient tenus enuoyer au Roy Tres-Chrestien la profession de leur foy, telle qu'elle se trouue en l'ancienne collection du Cardinal Deus-dedit, & en quelque registre du thresor du Roy, sous le nom de Benedictus, adioustans que le Pape Boniface v 111. l'enuoya sub plumbo, à l'exemple de celle de Pelagius au Roy Childebert, dont se voyent quelques eschantillons ou decret de Gratian. Ce que ie ne trouue auoir esté continué par forme de coustume louable ou autrement:& semble que cela ait esté fait par aucuns Papes à la priere des Rois de France, pour le deuoir commun de tous Chrestiens, qui sont admonnestez d'estre tousiours prests à rendre compte de leur soy, quand ils en sont requis: sinon que quelcun vousist encores remarquer cela pour vn reste de l'ancienne saçon de faire qui se pratiquoit lors que les Papes auoient accoustumé d'enuoyer leurs elections aux Rois de France pour les agreer & consirmer.

Les Rois tres-Chrestiens ont de tout temps, selon les occurrences & necessitez de leur pays, assemblé ou fait assembler Synodes ou Conciles prouinciaux & nationaux, esquels, entre autres choses importantes à la conservation de leur estat; se sont aussi traistez les affaires concernans l'ordre & discipline Ecclesiastique de leur pays, dont ils ont fait faire reigles, chapitres, loix, ordonnances, & pragmatiques sanctions sous leur nom & authorité, & s'en lisent encor auiourd'huy plusieurs és recueils des decrets receus par l'Eglise vniuerselle, & aucuns approuuez par Conciles generaux.

Le Pape n'enuoye point en France Le-

gats

gats à latere auec faculté de reformer, iuger, conferer, dispenser, & telles autres qui ont accoustumé d'estre specifiees par les bulles de leur pouuoir, sinon à la postulation du Roy tres-Chrestien, ou de son consentement: & le Legat n'vse de ses facultez qu'apres auoir baillé promesse au Roy par escrit sous son sein, & iuré par ses sainctes Ordres de n'vser desdictes facultez és Royaumes, pays, terres, & seigneuries de sa sujettion, sinon tant & si longuement qu'il plaira au Roy: & que si tost que ledict Legat sera aduerty de sa volonté au contraire, il s'en desistera & cessera. Aussi qu'il n'vsera desdictes facultez sinon pour le regard de celles dont il aura le consentement du Roy, & conformément à iceluy, sans entreprendre ny faire chose preindiciable aux saincts decrets, Conciles generaux, franchises, libertez, & priuileges de l'Eglise Gallicane, & des Vniuersitez & estudes publiques de ce Royaume. Et à ceste sin se present les facultez de tels Legats à la Cour de Parlement, où elles sont veues, examinees, verifices, publices & registrees sous telles modifications que la Cour voit estre à faire pour le

bien du Royaume: suyuant lesquelles modifications se iugent tous les procés & differents qui suruiennent pour raison de ce, & non autrement.

Semblablement le Legat d'Auignon, quand ses facultez s'estendent outre le Comtat de Venise, & terres dont le Pape iouit à present, au parauant qu'vser de ses facultez és pays de l'obeyssance & souueraineté du Roy, fait pareil serment, & baille semblable promesse par escrit, & notamment de n'entreprendre aucune chose sur la iurisdiction seculiere, ny distraire les sujets, interdire ou excommunier les Officiers du Roy, ou faire chose contre les libertez de l'Eglise Gallicane, edicts, coustumes, statuts, & privileges du pays. Et sous ces modifications, & à la charge d'icelles, sont ses facultez & celles de ses Vice-legats, verifices en la Cour de Parlement de Dauphiné & autres, respectivement pource qui est de leur ressort, apres qu'elles ont esté presentees par eux auec placet, & lettres du Roy.

Les Prelats de l'Eglise Gallicane, encores qu'ils soyent mandez par le Pape pour qu'elque cause que ce soit, ne peuvent sorL'EGLISE GALLICANÉ.

tir hors le Royaume, sans commandemet,

ou licence & congé du Roy.

Le Pape ne peut leuer aucune chose sur le reuenu du temporel des benefices de ce Royaume, sous pretexte d'emprunt, impost, vacant, des pouille, succession, deport, incompatibilité, commande, neusieme, decime, annate, procuration, commus ou menus services, propine, ou autremét, sans l'authorité du Roy, & consentement du Clergé: mesmes ne peut par ses bulles de pardons & indulgences, charger les sujets du Roy de donner deniers, ou autres aumosnes pour iceux gaigner: ny en donnant dispenses, se reserver ou attribuer à sa chambre les deniers des amades: & sont telles clauses reputees abusiues.

Le Pape ne peut exposer en proye ou donner le Royaume de France, & ce qui en depend, ny en priuer le Roy, ou en dissposer en quelque façon que ce soit: Et quelques monitions, excommunications ou interdictions qu'il puisse faire, les sujets ne doiuent laisser de rendre au Roy l'obeissance deüe pour le temporel, & n'en peuvent estre dispensez, ny absous par le

Pape.

Ne peut aussi excomunier les Officiers du Roy, pour ce qui concerne l'exercice de leurs charges & offices; & s'il le fait, ce-luy qui l'a poursuiuy est contraint par peines & amandes, & par saisse de sontemporel, ores qu'il fust Ecclesiastique, de faire renoquer telles censures. Aussi ne sont les dits officiers censez comprins és termes des monitions generales pour ce qui concerne leurs dits charges.

Les clauses inserees en la bulle de Cæna Domini, & notamment celles du temps du Pape Iules 11. & depuis n'ont lieu en Frace, pour ce qui cocerne les libertez & priuileges de l'Eglise Gallicane, & droicts du

Roy, ou du Royaume.

Ne peut le Pape iuger ny deleguer pour cognoistre de ce qui concerne les droits, preeminences & privileges de la couronne de France, & ses appartenances: & ne plaide iamais le Roy de ses droits & pretensions qu'en sa Cour propre.

Les Comtes, qui s'appellent Palatins, creez par le Pape, ne sont recogneus en France pour y vser de leurs pouvoirs, ou privileges, non plus que ceux creez par

l'Empereur.

### L'EGLISE GALLICANE.

Les Notaires Apostoliques ne peuuent receuoir contracts de choses temporelles & profanes entre les sujets du Roy: & ne portent les contracts par eux receus, comme ventes, eschanges, donations, & tels autres, aucune hypotheque sur les biens assis en ce Royaume, mais sont reputez

sans effect pour ce regard.

Le Pape ne peut legitimer bastards & illegitimes, pour les rendre capables de succeder, ou leur estre succedé, ny pour obtenir offices & estats seculiers en ce Royaume:mais bien les dispenser, pour estre pourueus aux ordres sacrez & benefices : ne faisant toutesfois preiudice pour ce regard aux fondations seculieres, ou priuileges obtenus en faisant icelles par les seculiers ou Ecclesiastiques sur leurs patrimoines & biens seculiers; ny pareillement aux statuts, coustumes, & autres constitutions seculieres.

Ne peut aussi aucunement restituer les laiz contre l'infamie par eux encourue; ny les clercs, finon aux fins d'estre receus aux ordres, offices & actes Ecclesiastiques, &

non autrement.

Ne peut remettre en ce Royaume l'a-

mende honorable adiugee à vn lay, encores que la condemnation fust de iuge Ecclesiastique, & contre vn clerc: come faifant telle condemnation honorable, partie de la reparation ciuile.

Ne peut proroger le temps donné aux executeurs de testamens pour faire l'execution d'iceux, au prejudice des heritiers, legataires, creanciers & autres y ayans in-

terest civil, Ne peut conuertir aucuns legs, ores qu'ils fussent pitovables, en autre vsage contre la volonté des defunts, sinon és cas esquels telle volonté ne pourroit estre accomplie formellement, ou qu'il fust besoin de faire ladite commutation; pourueu encores qu'esdics cas elle soit equipolente à ce qui avoit esté ordonné par le testamet, ou autre disposition de derniere volonté: dont neantmoins, outre le cas de coscience, la cognoissance appartient au juge lay.

Ne peut bailler permissio aux gens d'Eglise estas de l'obeissance du Roy, ou à autres tenás benefices en ce Royaume, mesmes aux reguliers & religieux profez, de tester des biens & fruits de leurs benefices situez en ce Royaume, au preiudice des

ordon

ordonnances & droits du Roy, & des couflumes des païs & prouinces d'iceluy: ny empescher que les parents desdits clercs decedez, ou religieux faisans profession, ne leur succedent en tous leurs biens, mesmes és fruits de leurs benefices.

Ne peut aussi permettre ou dispenser aucun de tenir & posseder biens en ce Royaume, contre les loix, statuts ou coustumes des lieux, sans congé & licence du

Roy.

Ne peut permettre aux Ecclesiastiques d'aliener les biens immeubles des Eglises & benefices assis en France, pour quelque cause d'vtilité euidente, ou vrgente necessité que ce soit, & par quelque forme de contract que ce puisse estre, comme par vendition, eschange, infeudatio, bail à ces ou à rente emphyteose à longues annees; encor que lesdits benefices soient de ceux qui se dient exempts, & immediatement sujets au saint siege Apostolique: mais bié peut bailler rescrit, ou delegation à sujets & habitans de ce Royaume, à fin de cognoistre, traister & juger de l'vrilité euidéte, ou vrgente necessité: & ce faiet, suivant la forme de droict, interposer sa confirmation & son decret selon que la matiere le requiert, sans toutessois entreprendre sur ce qui est de la iurisdiction seculiere.

Moins encor peut-il ordonner ou permettre aucune alienation desdits immeu-

bles auec clause inuitis Clericis.

Ne peut deroger ny preiudicier par prouisions beneficiales, ou autrement, aux fondations laïcales, & droits des Patrons

laics de ce Royaume.

Le Pape ne peut par luy ny par son Legat à latere, ou par ses subdeleguez, ercer iurisdiction sur les sujets du Roy, mesme de leur consentement, en matieres de petition de dot, separation de mariez quant aux biens, crimes d'adultere, de faux, de pariure, sacrilege, vsure, ou restitution de biens mal prins par contracts illicites & vsuraires, perturbatio du repos public, soit par introduction de nouvelles sectes sedicieuses ou heretiques, quand il n'est question que de faict:ny autrement en quelque matiere que ce soit, és cas dont la cognoissance appartiét au Roy & aux juges seculiers my pareillement absordre les sujets du Roy desdits cas, sino quat à la consciéce & jurisdictio penitécielle seulemet.

L'EGLISE GALLICANE.

Ne peut vser en France de sequestration reelle en matiere beneficiale ou autre

Ecclesiastique.

Ne peut cognoistre des crimes qui ne sont purs Ecclesiastiques, & non mixtes, à l'encontre de purs laics: mais bien à l'encontre des gens d'Eglise seulement : contre lesquels il peut vser de condemnations selon les sanctions canoniques, decrets conciliaires & pragmatiques, & conformément à iceux. Et quant aux laics, pour les crimes purs Ecclesiastiques, ne peut vser contre eux de condemnations d'amendes pecuniaires, ou autres concernans directement le temporel.

Encores que les religieux mendians, ou autres, pour ce qui concerne leur discipline, ne puissent s'addresser aux iuges seculiers sans enfreindre l'obedience, qui est le nerf principal de leur profession: Toutesfois en cas de sedition, ou tumulte & grand scădale, ils y peuvent auoir recours par requisition de l'impartition de l'aide du bras seculier: Et pareillement à la Cour de Parlement, quand il y a abus clair & euident par contrauentions aux ordonnances royaux, arrests & iugemens de ladicte Cour, ou statuts de leur reformation authorisez par le Roy & par ladicte Cour, ou aux saincts Canons conciliaires & decrets, desquels le Roy est conservateur en

fon Royaume.

Monitoires ou excommunications auec clause satisfactoire, qu'on appelloit anciennement super obligatione de nisi, ou significauit, comprenat les laics & dont l'absolution est reservee superiori vsque ad satisfactionem, ou qui sont pour choses immeubles, celles qui contiennent clauses imprecatoires contre la forme prescrite par les Conciles, & pareillement celles dont l'absolution est par expres reseruee à la personne du Pape, & qui emportet distraction de la iurisdiction ordinaire, ou qui font contre les ordonnances du Roy, & arrests de ses Cours, sont censees abusiues:mais est permis se pouruoir par deuat l'ordinaire par monition generale in forma malefactorum, pro rebus occultis mobilibus, & vsque ad reuelationem duntaxat. Et si le lay s'y oppose, la cognoissance de son opposition appartient au juge lay, & non à l'Ecclesiastique.

Pendant l'appel comme d'abus de l'ôttroy ou publicatio d'vne monitio, la Cour L'EGLISE GALLICANE. 10 du Roy peut ordonner que sans preiudice des droits des parties, le benefice d'absolution à cautele sera imparty à l'appelant, soit clerc ou lay: & qu'à ce faire & souffrit l'Euesque sera contraint mesmes par saisse de son temporel, & son vicegeret par toutes voyes deues & raisonnables.

Vn Inquisiteur de la foy n'a capture ou arrest en ce royaume, sino par l'aide & au-

thorité du bras seculier.

Le Roy peut iusticier ses officiers clercs, pour quelque faute que ce soit commise en l'exercice de leurs charges, nonobstant

le prinilege de clericature.

Nul de quelque qualité qu'il soit ne peut tenir aucun benefice, soit en titre ou à serme, en ce Royaume s'il n'en est natif, ou s'il n'a lettres de naturalité, ou de dispense expresse du Roy à ceste sin, & que ses lettres ayent esté verisées où il appartient.

De la seconde maxime depend ce que l'Eglise Gallicane a tousiours tenu, que, combien que par la reigle Ecclesiastique, ou (comme dit sainst Cyrille escriuant au Pape Celestin) par l'ancienne coustume de toutes les Eglises, les Conciles gene-

raux ne se doiuent assembler ny tenir sans le Pape claue non errante, recogneu pour ches & premier de toute l'Eglise militâte, & pere commu de tous Chresties, & qu'il ne s'y doiue rien conclure ny arrester sans luy & sans son authorité, toutes sois il n'est estimé estre par dessus le Concile vniuer-sel, mais tenu aux decrets & arrests d'ice-luy, comme aux commandemes de l'Eglise espouse de nostre Seigneur Iesus Christ, laquelle est principalement representee par telle assemblee.

Aussi l'Eglise Gallicane n'a pas receu indifferemment tous Canons & Epistres decretales, se tenant principalement à ce qui est contenu en l'ancienne collection appellee Corpus canonum, mesme pour le regard des Epistres decretales iusques au

Pape Gregoire 1 1.

Le Pape ne peut dispenser pour quelque cause que ce soit de ce qui est de droit diuin & naturel, ny de ce dont les saincts Conciles ne luy permettét de faire grace.

Les reigles de Chancellerie Apostolique, durant mesmes le Pontificat du Pape qui les a faites ou authorisees, ne lient l'Eglise Gallicane, sinon entant que volontairement elle en reçoit la prattique, comme elle a fait des trois qu'on appelle de publicandis resignationibus in partibus, de verisimili notitia obitus, és de insirmis resignantibus, authorisees par les edits du Roy, & arrests de son Parlement, ausquelles le Pape ny son Legat ne peut deroger, fors à celle de insirmis resignantibus, de laquelle on reçoit leur dispense, mesme au prejudice des graduez nommez en leurs mois.

Bulles ou lettres Apostoliques de citation executoriales, sulminatoires, ou autres ne s'executent en France sans pareatis du Roy ou de ses officiers: & l'execution qui s'ent peut saire par le lay apres la permission, se fait par iuge royal ordinaire de l'authorité du Roy, & non authoritate Apostolica, pour euiter distraction & meslange de iurissidiction: mesmes celuy qui a impetré bulles, rescrits, ou lettres pourtas telle clause, est tenu declarer qu'il entend que les deleguez ou executeurs, soient clercs ou laics, en cognoissent iure ordinario: autrement y auroit abus.

Le Pape ou son Legat à latere, ne penuét cognoistre des causes Ecclesiastiques en premiere instance, ny exercer iurisdiction

sur les sujets du Roy & demourans en son royaume, païs, terres & seigneuries de son obeissance, soit par citation, delegation ou autrement, posé ores qu'il y eust consente. ment du sujet : ny entre ceux mesmes qui se dient exempts des autres iurisdictions Ecclesiastiques, & immediatement sujets quant à ce au sainct siege Apostolique, ou dont les causes y sont legitimement deuolues:pour le regard desquels, en ce qui est de sa iurisdiction, il peut seulement bailler iuges deleguez in partibus, qui est à dire és parties desdits royaume, terres & seigneuries, où lesdites causes se doiuent traitter de droit commun, & au dedans des mesmes dioceses:Desquels iuges deleguez les appellations (si aucunes s'interiettent) y doiuent aussi estre traitees iusques à la sinale decision d'icelles, & ce par iuges du royaume à ce deleguez. Et s'il se fait au cotraire, le Roy peut decerner ses lettres inhibitoires à sa Cour de Parlement, ou autre iuge, où se peut la partie y ayant interest, pouruoir par appel comme d'abus.

Semblablement pour les appellations des Primats & Metropolitains en causes spirituelles qui vont aut Pape, il est tenu

bailler

bailler iuges in partibus & intra eandem diæ-

cesim.

Quand vn François demande au Pape vn benefice assis en France, vacant par quelque sorte de vacation que ce soit, le Pape est tenu luy en faire expedier la signature du iour que la requisition & supplication luy en est faite, sauf à disputer par apres de la validité ou inualidité par deuant les iuges du Roy, ausquels la cognoissance en appartient: & en cas de refus fait en Cour de Rome, peut celuy qui y pretend interest presenter sa requeste à la Cour, laquelle ordonne que l'Euesque diocesain ou autre en donnera sa prouision, pour estre de mesme effet qu'eust esté la date prise en Cour de Rome, si elle n'eust esté lors refusee.

Le Pape ne peut augméter les taxes de prouisions qui se font en Cour de Rome des benefices de France, sans le consentement du Roy & de l'Eglise Gallicane.

Le Pape ne peut faire aucunes vnions ou annexes des benefices de ceroyaume à la vie des beneficiers, ny à autre téps: mais bien peut bailler rescrits delegatoires à l'effet des vnions qu'on entendra faire se-

### LIBERTEZ DE

lon la forme contenue au cocile de Conflance, & non autremet: & ce auec le confentement du patron & de ceux qui y ont interest.

Ne peut creer pensions sur les benefices de ce royaume ayans charge d'ames, ny sur autres, ores que ce fust du consentement des beneficiers, sinon conformémet aux saints decrets conciliaires & canoniques sanctions, au profit des resignans quad ils ont resigné à ceste charge expresse;ou bié pour pacifier benefices litigieux: &fi ne peut permettre que celuy qui a pésion creée sur vn benefice, la puisse transferer en autres personnes, ny qu'aucu resignant retienne au lieu de pésion tous les fruits du benefice resigné ou autre quantité desdits fruits excedans la tierce partie d'iceux, ores que ce fust du consentement des parties, comme dit est.

Ne peut composer auec ceux qui auroient esté vrais intruz és benefices de ce royaume, sur les fruits mal prins par eux, ny les leur remettre pour le tout ou en par tie au prosit de sa chabre, ny au preiudice des Eglises ou personnes au prosit desquels tels fruits doiuent estre conuertis. LEGLISE GALLICANE.

Les collations & prouisions des benefices resignez és mains du Pape ou de son Legat ne doiuent contenir clause, par laquelle soit ordonné que soy sera adioustee au contenu des bulles, sans qu'on soit tenu d'exhiber les procuratios, en vertu desquelles les resignations sont faites, ou sans faire autre preuue valable de la procuration au presudice du resignation.

Aussi ne se peut és collations & prouisions de benefices mettre clause antéseri, ou autre semblable, au prejudice de ceux ausquels parauant & lors de telle prouision seroit acquis droit pour obtenir le

benefice.

Mandats de providendo, graces expectatiues generales ou speciales, reservations, regrez, translations, mesmes de prelatures, dignitez, & autres benefices estás à la nomination du Roy, ou presentations de patros laics, & telles autres vsances de Cour de Rome declarees abusiues par les edits du Roy & arrest de son Parlement, ne sont receus, & n'ont lieu en France.

Et quant à la preuention, le Pape n'en vse que par souffrance, au moyen du Concordat publié du tres-exprés commandement du Roy, contre plusieurs remonstraces de sa Cour de Parlement, oppositions formees, protestations & appellations interiettees. Et depuis encore tous les trois Estats du Royaume assemblez en sirent plainte, sur laquelle furent enuoyez ambassadeurs à Rome pour faire cesser ceste entreprise, qu'on a par sois dissimulee & tolcree en la personne du Pape, mais non d'autre, quelque delegation, vicariat ou faculté qu'il eust de sa saincteté: & si l'a on restreint tant qu'on a peu, iusques à iuger que la collation nulle de l'ordinaire empesche telle preuention

Resignations ou procurations portans clause in fauorem certa persona, & non alias, aliter, nec alio modo, & les collations qui s'en ensuiuent sont censees illicites & de nulle valeur, comme resentans simonie, & ne tiennent, mesmes au preiudice des resignans, encor que les collatios eussent esté faites par le Legat à latere, en vertu de ses facultez. Toutes sois celles faites par le Pape mesmes, s'exceptent de ceste reigle &

maxime.

Le Pape ny son Legat ne peuuet dispé-

L'EGLISE GALLICANE. 14 fer les graduez, des téps & cours de leurs estudes, ny autrement pour les rendre capables de nominations de benefices, &

tels autres droits & prerogatiues.

Le Legat à latere ne peut deputer Vicaires, ou subdeleguer pour l'exercice de sa legation sans le consentement exprés du Roy, mais est tenu exercer luy-mesmes son pouvoir tant qu'il dure.

Et si ne peut vser de la puissance de coferer les benefices de ce Royaume, quand il est en païs hors l'obeissance du Roy.

Et à son partement, est tenu laisser en France les registres des expeditions faites du temps de sa legation, pour ce qui concerne le royaume de France, ensemble les seaux d'icelle, és mains de quelque fidele personnage que le Roy depute, pour expedier ceux qu'il appartiendra. Et sont les deniers procedans desdites expeditions conuertis en œuures pitoyables, ainsi qu'il plaist à sa Majesté en ordonner.

Le Pape ne peut conferer ny vnir hospitaux, ou le proseries de ce royaume, & n'a lieu en iceux la reigle de pacificis.

Ne peut creer Chanoines d'Eglise cathedrale ou collegiale sub expectatione sutura prabenda, etiam du consentement des chapitres, sinon à sin seulement de pouuoir retenir en icelles dignité, personat, ou office.

Ne peut conferer les premieres dignitez des Eglises cathedrales post Pontificales maiores, ny les premieres dignitez des Eglises collegiales, esquelles se garde la forme d'election, prescrite par le concile de Latran.

Ne peut dispéser au preiudice des louables coustumes & statuts des Eglises cathedrales ou collegiales de ce royaume, qui concernent la decoration, entretenement, continuation, & augmentation du seruice diuin: si sur ce y a approbation, priuilege & confirmation Apostolique, octroyee pour la susdite cause ausdites Eglises, à la requeste du Roy patron d'icelles: encor que les dits priuileges ainsi octroyez, soyent subsequents les sondations des dites Eglises.

On peut en France prendre possession d'vn benesice en vertu de simple signature, sans bulles expedices sous plomb.

Le droict qu'on appelle de Regale, approuué par aucuns saincts Decrets, semble

L'EGLISE GALLICANE. semble se pouuoir mettre entre les libertez de l'Eglise Gallicane, comme dependant du premier chef de la maxime generale cy dessus. Car encores qu'aucuns grāds personnages ayent voulu faire deux sortes ou especes de Regales, distinguans le temporel du spirituel; ce neantmoins considerant de plus pres, il ne s'en trouuera qu'vn procedant de mesme source, & se pourra dire droict, non à la verité de rachapt ou relief, mais plustost de bail, garde, protection, main-bournie, ou patronnage, & emporter la collation des prebendes, dignitez & benefices non curez vacants de droict & de faict ensemble, ou de faict, ou de droit tant seulement, comme faisant à present telle collation aucunement partie des fruiets de l'Euesché ou Archeuesché, lesquels se partagent au reste entre le Roy & les heritiers du defunct Prelat, au prorata de l'annee, mesmes pour le regard desia perceus auparauant le decez. Mais outre à ce droict quelques fingularitez & privileges particuliers, comme de durer tréte ans, d'estre ouvert par la promotió au Cardinalat ou Patriarchar, de n'estre clos par souffrance ny au-

trement, iusques à ce que le successeur Eucsque ou Archeuesque ait fait & presté au Roy le serment de fidelité, & qu'il ait presenté & fait registrer les lettres d'iceluy en la chambre des Comptes, apres auoir baillé les siennes addressau Roy, & que le Receueur ou Commissaire de la Regale ait receu mandemét de ladite Chambre, pour luy delaisser la pleine iouyssance de son benefice. Aussi à la Regale-ceste preeminence de ne se pouvoir cumuler d'autres droits que du Roy, non pas de ceux du Pape mesmes: de n'estre suiette à la iurisdistió & cognoissance d'autre que du Roy, & de sa Cour de Parlement, ny pareillement aux reigles de la Chancelerie de Rome, mesmes à celles de verisimili notitia obitus, ny encorà celle de pacificis, sinon quand le different est entre deux regalistes qui s'aident de leur possession, ny aux facultez de Legats, dispenses, devoluts, nominatios, & pareilles subtilitez de droict Canon,&c.

Se peut aussi mettre en ce mesme rang le droict de donner licence & congé de s'assembler pour elire, & celuy de consirmer l'election deuement faite, dont les

16

Roys de France ont tousiours iouy tant que les elections ont eu lieu en ce Royaume, & en iouyssent encor à present en ce qui reste de ceste ancienne forme.

Mais on pourroit douter si le droict de Nomination doit estre mis entre les libertez, plustost qu'entre les priuileges, d'autant qu'il pourra sembler tenir quelque chose de passe-droit, attendu mesmes ce que Loup Abbé de Ferrieres, Prelat fort sage, & des plus sçauans du temps du Roy Charles le Chauue, tesmoigne q les Merouingues & Pepin eurent encor sur ce le consentement du Pape Zacharie en vn Synode, à ce que le Roy pour maintenir son estat en repos, peust nomer aux grandes & importates dignitez Ecclesiastiques, personnes de son royaume, ses subiets, dot il s'asseurast, dignes neatmoins de la charge. Et toutesfois ce droit se voit indifferemment practiqué par les moindres patros laics: ce qui le doit faire trouuer plus legitime & tolerable en la personne du Roy tres-Chrestien, premier & vniuersel patron & protecteur des Eglises de son royaume, pour le regard duquel on a tenu & pratiqué ceste maxime, mesme despuis les Cocordats, Qu'en tous Archeueschez, Eueschez, Abbayes, Prieurez, & autres benefices vrayemet electifs, soit qu'ils ayent priuilege d'elire ou non, resignez en Cour de Rome infauorem, ou causa permutationis est requise & necessaire la nomination du Roy, sous peine de nullité: sino qu'il y eust possession triennale passible depuis la prouision: Et que les dits droits de Regale & Nomination ont lieu, encores que le beneficié soit mort à Rome, & que le benefice ait vacqué in Curia Romana.

Ie compteray plustost entre les priuileges les indults d'aucunes Cours souveraines, encores qu'ils soyent plus anciens qu'aucuns ne pensent, & qu'il s'en trouve quelques remarques dés le temps du Pape Sixte quatriesme, voire & sous le regne

de Philippes le Bel.

Et pareillement plusieurs autres prinileges octroyez particulierement aux Rois & Roines de France, à nos seigneurs leurs Enfans, Princes du sang, & à leurs seruiteurs familiers & domestiques, dont le rapport n'a semblé estre de ce memoire, ains plustost appartenir à autre traicté.

Mais ie n'y obmettray les exemptions d'aucu

L'EGLISE GALLICANE. d'aucunes Eglises, Chapitres, Corps, Colleges, Abbayes, & Monasteres, de leurs Prelats legitimes, qui sont les diocesains & metropolitains: lesquelles exemptions ont autrefois esté octroyees par les Rois & Princes mesmes, ou par les Papes à leur poursuite, & pour tresgrandes & importantes conderations, despuis debattues & soustenues és conciles de Basse & de Constance: dont furent deslors publiez quelques memoires. Tant y a qu'on peut dire, auec verité pour ce regard, que nul Monastere, Eglise, College, ou autre corps Ecclesiastique ne peut estre exempté de son ordinaire, pour se dire dependre immediatement du sainct Siege, sans licence & permission du Roy.

Ie ne puis aussi obmettre en ce lieu, ce que le Pape Alexandre troisses en vne sienne Epistre decretale remarque pour vne coustume ancienne de l'Eglise Gallicane, de pouvoir tenir ensemble plusieurs benefices: ce qu'il dit toutes sois estre contre les anciennes reigles Ecclesiastiques, notamment pour le regard des benefices qui ont charge d'ames, & requierent re-

sidence personnelle & actuelle.

## LIBERTEZ DE

Et neantmoins on peut dire auec verité, que la mesme Eglise Gallicane a tenu, & la Cour de France iugé, que le Pape ne peut conferer à vne mesme personne plusieurs benefices sub eodem tecto, soit à vie ou à certain temps, mesmes quand ils sont vnisormes, comme deux chanoinies, prebendes, ou dignitez en mesme Eglise cathedrale ou collegiale: & a modifié les facultez d'aucuns Legats pour ce regard.

l'oseray encor mettre entre les priuileles, mais non Ecclesiastiques, le droict de tenir dixmes en fief par gens purs laics. Ce qu'on ne peut nier auoir prins son origine d'vne licence & abus commécé sous Charles Martel Maire du Palais, & continué principalement sous les Rois de sarace, & neantmoins toleré pour aucunes considerations, mais auec tel temperamet sous les derniers, que le lay peut rendre ou doner tels fiefs à l'Eglise, & l'Eglise les receuoir & retenir sans permission du Prince: & qu'estans retournez en main Ecclesiastique, ils ne sont sujets à retraict de personne laye, sous pretexte de lignage, feudalité, ny autrement: & dés lors en appartient la cognoissance au iuge Ecclesiastique

stique pour le regard du petitoire.

Or pour la conservation de ces libertez & privileges (que nos Rois tres-Chresties, qui portent la Couronne de franchise sur tous autres, iurent solemnellement à leur Sacre & couronnement de garder & faire garder inviolables) se peuvent remarquer plusieurs & divers moyens sagement pratiquez par nos ancestres, selon les oc-

currences & les temps.

Premierement par conferences amiables auec le sainct Pere, ou en personne, ou par ambassadeurs. Et à cest essect se trouue que les ancies Rois de Frace (mesme ceux de la race de Pepin, qui ont eu plus de sujet de communication auec le S. Siege que leurs predecesseurs) auoient comme pour marche commune la ville de Grenoble, où encores le Roy Hugues pere de Robert, inuita le Pape par forme d'vssace & coustume, par vne epistre escrite par Gerbert lors Archeuesque de Rheims depuis Pape, sur le disserend de l'Archeuesché de Rheims.

Secondement, observans soigneusement que toutes bulles & expeditions venans de Cour de Rome sussent visitees, pour sçauoir si en icelles y auoit aucune chose qui portast preiudice, en quelque maniere que ce sust, aux droits & libertez de l'Eglise Gallicane, & à l'authorité du Roy. Dont se trouue encores ordonnance expresse du Roy Loys onzieme, suivie par les predecesseurs de l'Empereur Charles cinquiéme, lors vassaux de la couronne de Frace, & par luy-mesmes en vn sien Edict sait à Madril en l'an 1543. & pratiqué en Espagne & autres païs de son obeyssance, auec plus de rigueur & meins de respect qu'en ce Royaume.

Tiercement, par appellations interiettees au futur Concile, dont se trouuent plusieurs exemples, mesmes és dernier, temps de celles interiettees par l'Vniuersité de Paris, des Papes Boniface v 111. Benedict onzieme, Pie deuxieme, Leon dixieme, & autres. Qui sut aussi le moyé que maistre Iean de Nanterre, Procureur general du Roy prattiqua contre les bulles du Cardinal de Balüe, appellant d'icelles ad Papam melius informatu, aut ad eos ad quos pertinebat. Et pareillement maistre Iean de sainct Romain contre certaines censures, auec protestations de nullité & de recours ad illum, seu ad illos: ad quem, seu ad quos, &c.

Quartement, par appellations precises comme d'abus, que nos peres ont dit estre quand il y a entreprise de iurisdiction, ou attentat contre les faints decrets & canos receus en ce royaume, droits, franchises, libertez, & priuileges de l'Eglise Gallicane, concordats, edits & ordonances du Roy, arrests de son Parlement: Bref, contre ce qui est non seulement de droiet commun, divin ou naturel, mais aussi des prerogatiues de ce royaume, & de l'Eglise d'iceluy.

Lequel remede est reciproquement comun aux Ecclesiastiques pour la conseruation de leur authorité & iurisdiction : si que le Promoteur ou autre ayant interest, peut aussi appeller comme d'abus de l'entreprise ou attentat fait par le iuge lay, sur ce qui luy appartient.

Et est encores tres-remarquable la singuliere prudéce de nos majeurs, en ce que telles appellations se iugent non par personnes pures layes seulement, mais par la grande Chambre du Parlement, qui est le lict & siege de Iustice du royaume, composee de nombre egal de personnes, tant

## LIBERTEZ DE

Ecclesiastiques que non Ecclesiastiques, mesme pour les personnes des Pairs de la Couronne.

Qui est vn fort sage temperamet, pour seruir comme de lien & entretien comun des deux puissances, si que l'vne & l'autre n'ont iuste occasio de se plaindre, & beaucoup moins que des inhibitions & autres moyens qui se pratiquent ailleurs, mesmes par ceux qui se vantent d'extreme obeissance, plus de parole que de faict.

Au surplus, tous ceux qui iugent droitement des choses, peuuent assez recognoistre de quelle importance a esté, & est encores autant & plus que iamais, la bonne & entiere intelligence d'entre nostre S.Pere le Pape & le Roy de France, lequel pour tresiustes causes & tresgrands merites, a emporté sur tous autres le tiltre de tres-Chrestie, & premier fils & protecteur de l'Eglise. Et pource doiuent-ils en general & en particulier estre d'autant plus soigneux d'entretenir les liens de ceste concorde, par les mesmes moyes qui l'ont faict durer iusques à cy, supportas plustost les imperfections qui y pourroyent estre que s'efforçans de roidir outre mesure les cordes L'EGLISE GALLICANE. 20 cordes d'vn nœu si franc & volontaire: de peur que par trop serrer & estreindre, elles ne se relaschent, ou (qui pis seroit, ce que Dieu ne vueille permettre) rompent tout à fait, au danger & dommage certain de toute la Chrestiété, & particulieremét du sainct Siege, duquel vn de sesplus sages Prelats a tresprudément recogneu & tesmoigné par escrit que la conservation des droits & prerogatives de la couronne de France estoit l'affermissement.



## Prouerb. xx11.

באלפטל המיניג מעניג כא איד. בס באלפטל המיכו (נוניה איני) או או או או באוני אוני ריפוני תווני חוד נו אף וביו ער ביל כול ורוו של רכ, בי

Ne transgrediaris terminos antiquos, quos posuerunt patres tui.

eso noisearal .. Eccl. x. 1123 e 12 en com

Qui disipat sapem, mordebit eum coluber.

## Πρός Γαλάτας έ.

Υμεῖς η ἐπ' ἐλουθερία ἐπλήθητε, ἀθελφόι μόνον μὴ τὰν ἐλουθερίαν εἰς ἀφοςμίω τῆ σαρκὶ, ἀλλα Δια τὰ τὰ ἀχάπης θελούετε ἀλλήλοις.

Ο 38 πας νόμι το το λόγω πλης εται, ον τως, Αγαπήσεις το πλησίον σε ως ξαυτόν.

